

အပိကပိကျ်

AWIG - AWIG

၇မာကမမာ၇မာကွယု

DESA ADAT DENKAYU



၇မာကပိမိသုပက

DESA WERDI BHUWANA

နီမမမာနီတို၊ ကမုပ၇မာကွယု

KECAMATAN MENGWI, KABUPATEN BADUNG

ဗွဲကဗျ်

2012

BANTANG AWIG-AWIG DESA ADAT DENKAYU

MURDDHA CITTA	1
SARGAH PERTAMA ARAN LAN WEWIDANGAN DESA	2
SARGAH KALIH PATITIS LAN PAMIKUKUH	4
SARGAH TIGA SUKERTA TATA PAKRAMAN	5
Palet 1 Indik Krama	5
Palet 2 Indik Parajuru lan Dulu Désa	10
Palet 3 Indik Kulkul	16
Palet 4 Indik Paruman	18
Palet 5 Indik Druwén Désa	21
SARGAH PAT SUKERTA TATA AGAMA	22
Palet 1 Indik Déwa Yadnya	22
Palet 2 Indik Resi Yadnya	25
Palet 3 Indik Pitra Yadnya	30
Palet 4 Indik Manusa Yadnya	31
Palet 5 Indik Bhuta Yadnya	32

SARGAH LIMA SUKERTA TATA PAWONGAN	34
Palet 1 Indik Pawiwahan	34
Palet 2 Indik Nyapihan	42
Palet 3 Indik Sentana	43
Palet 4 Indik Warisan	46
SARGAH NEM SUKERTA TATA PALEMAHAN.....	49
Palet 1 indik Dusta lan Bhaya.....	49
Palet 2 indik Karang, Tegal, lan Carik	51
Palet 3 Pepayonan	53
Palet 4 Wewalungan	55
Palet 5 Wewangunan	57
Palet 6 Indik Karesikan utawi Kabersihan	57
Palet 7 Panyanggra	58
SARGAH PITU WICÀRA LAN PAMIDANDA	60
Palet 1 Indik Wicàra	60
Palet 2 Indik Pamidanda	62
SARGAH KUTUS NGUWAH-UWUHIN AWIG-AWIG	64
SARGAH SIYA SAMÀPTA	66

Murdha Citta

OM Suwastyastu Naga Siwa Buddhaya

Malarapan saking panghyangning kalih paswecan Ida Hyang Parama Kawi, pingkalih Ida Bhatara-Bhatari, asung kertha wara nugraha ngawentenang kahuripan sakala niskala, Bhuwana Alit lan Bhuwana Agung.

Sotaning bhuwana agung, desane wantah pawakan bhuwana maurip jangkep saha Tri Hita Karananya luwire :

ha. Parhyangan, sahananing kahyangan , panyiwian desa genah ngarcana Ida Hyang Parama Wisesa, pinaka atman desane.

na. Palemahan, tanah kakuwuban desa sinanggeh sthula sariraning desane.

ca Pawongan, krama saha warga desa maka sami maka pawakan Tri Kaya, mawaning desane sida molah maprawerti.

Adung patemoning bhuwana kalih, malarapan Çanta Jagadhita, sinanggeh murdhaning prayojana pangriptaning awig-awig Desa Adat Denkayu.

Maka ngastuti Bhukti mwanng Mukti, titiang sinamian saking Krama Desa Adat Denkayu, midabdad ngarajegang Awig-Awig sane kanggehang ring wewengkon Krama Desa Adat Denkayu kadi ring sor puniki.

Om Siddhirastu.

SARGAH PERTAMA
ARAN LAN WEWIDANGAN

Pawos 1

- (1) Desa Adat puniki mewasta Desa Adat Denkayu.
- (2) Jebag kakuwubwidangannya, mawates nyatur Desa :
 - ha. Sisih Wetan ring Subak Dukun/Pacung, Desa Baha.
 - na. Sisih Kidul ring Banjar Gambang, Banjar Batu.
 - ca. Sisih Kulon ring Tukad Ukun.
 - ra. Sisih Lor ring Margi ke Dukun/ Beji.

Pawos 2

Kakuwub wawidangan, Desane manut Dresta lwire :

- (1) Pepupulan Karang Pumahan, sinanggeh palemahan Desa Pakraman.
- (2) Setra, sawah miwah tegal ring kakuwub wawidangan Desa sejabaning palemahan Desa Pakraman manggeh telajakan Desa.

Pawos 3

- (1) Desa Adat Denkayune ke pah dados 2 (kalih) Banjar, lwire :
 - ha. Banjar Denkayu Delodan
 - na. Banjar Denkayu Baleran.

- (2) Wates wewidangan palemahan banjare, kemanggehang antuk paruman Desane.
- (3) Anut ring munjuk lungsur cacah jiwa pawongane pah-pahan Banjar rawuhing wates wewidanganya wenang robah manut pamutus Paruman Desa.
- (4) Banjare wenang ke pah dados tetempekan, manut pamutus paruman Banjar.

Pawos 4

- (1) Banjare wenang ngardi Awig-Awig miwah Pararem-Pararem maka pamikukuhnyane.
- (2) Awig-Awig kalih pararem Banjar tan wenang lempas ring Awig-Awig miwah pararem-pararem Desane, saha teher kalingga tanganin antuk Kelihan Dinas/Bendesa Adat, maka pamikukuh dumugi dados lumaksana.
- (3) Banjare patut maduwe piranti-piranti pamekasne Bale Banjar miwah Kulkul.

Pawos 5

- (1) Sahanan Tempekan tan wenang ngardi Awig-Awig Pararem.
- (2) Tempekan kemawon mawak pahan, sinanggeh tangan sukuning Banjar.

Pawos 6

- (1) Awig-Awig Pararem-pararem miwah sehanan Pasuaran Desane, manggeh kajejerang ring kakuwub wawidangan Desane sami.

- (2) Awig-Awig miwah pararem Subak-Subak ring telajakan Desane, tan maren manggeh kainggilang.

SARGAH KALIH
PATITIS LAN PAMIKUKUH

Pawos 7

Desa Denkayune puniki ngemanggehang pamikukuh:

- ha. Pancasila.
- na. Undang-Undang Dasar 1945, pamekas pasal 18 B.
- ca. Tri Hita Kârana, manut sadâcara Agama Hindu.
- ra. Hak Azasi Manusia utawi HAM.
- ka. Uger – uger saking Guru Wisesa indik Desa Adat.

Pawos 8

Lwir Patitis Desa Denkayune :

- ha. Mikukuhin miwah ngrajegang Sang Hyang Àgama Hindu.

- na. Ngutamayang tata prawretting maagama.
- ca. Ngrajegang kasukertan Désa saha Pawongannya sekala lan niskala.
- ra. Ngrajegang kasukertan druwen desa.
- ka. Nincapang pangeweruh kasusilan lan pengupajiwa.

SARGAH TIGA

SUKERTA TATA PAKRAMAN

Palet 1

Indik Krama

Pawos 9

- (1) Sahanan sang jenek mapumahan ring Desa Denkayu sinanggeh wong Desa Denkayu.
- (2) Wong Desa inucap linggihnyane wenten 2 (kalih) soroh :
 - ha. Keluarga sane magama Hindu tur ngeranjing mekrama sinanggeh sinanggeh warga Desa.
 - na. Sejaba punika sinanggeh tamiu.

Pawos 10

- (1) Sahanan kulawarga sane magama Hindu tur pastika nanggap Karang Desa, sinanggeh Krama Desa (sanunggal).

- (2) Satunggil Krama patut ngamedalan ayah anut karendahan kulawarganya
sinalih tunggil :
ha. Ayah Ngarep.
na. Ayah Balu.
- (3) Yan Kramane madruwe pasemetonan sane sampun maperabian sowang-
sowang patut tedun ngayah, kawastanin Ayah Pengele.
- (4) Ayah Ngarep sane sampun wenten sentanane maperabian, wenang nyada,
ayahan nyane kaselidihinin olih sentananyane inucap.
- (5) Yan wenten karang Desa Kepah, sane acutak kedadosang kalih utawi
langkungan, kulawarga sane nanggap punika sowang-sowang patut nedunin
makrama.

Pawos 11

- (1) Kulawarga sang magama Hindu sane ngawit pastika jenek mapumahan ring
kakuwub Desa Denkayu, wenang ngawidangang genah pumahannya.
- (2) Yan karang pumahan kulawarga-kulawarga inucap ring ajeng, boya karang
desa, patut karobah karanjingang dados karang desa.
- (3) Sang ayat ngeranjing makrama kadi ring ajeng, patut atur supeksa ring
Kelian Banjar sane ngawidangang genah pumahannya.

Pawos 12

- (1) Sinalih tunggiling kulawarga wusan makrama Desa, prade kulawarga inucap :
ha. Magingsir linggih saking Desa.
na. Kanorayang antuk Desane.
- (2) Sulur kalih tata nganorayang, lwire :
ha. Pastika wenten sudosan ipun;
na. Tan tinut ring pituduh Prajuru indik nyupat raga ngesehin solah prawerti.
ca. Katiwakin pamidanda, norane olih Kelian Desa (Bendesa Adat).
ra. Pamidande ngenorayang inucap, katur ring Pemerintah;
ka. Karang Desa sesakapan kulawarga inucap kacabut, mawantun ring Desa.
- (3) Sang wusan makrama tan wenten polih pah-pahan druwen Desa utawi Banjar.
- (4) Sang kanorayang kadi ring ajeng tan wenten polih pasayuban kasukertan saka lwire.

Pawos 13

- (1) Sahanan warga desa sane sampun mayusa anom miwah daha, sowang-sowang patut tedun Ngayah, kawastanin Ayah taruna (Sane Lanang) miwah ayah daha (sane istri).

- (2) Warga desane sane alit-alit sampun antes ngangon ($\pm$ mayusa 6 tahun) patut tedun Ngayah, kawastanin Ayah Teruna Nyoman (sane lanang) miwah (Ayah Daha Nyoman (sane istri).
- (3) Ayah teruna miwah daa puniki kapupulang ring sekaa Teruna miwah sekaa Daa, kalih sekaa Teruna Nyoman miwah sekaa Daha Nyoman.
- (4) Sekaa puniki ke pah manut Bebanjaran.

Pawos 14

- (1) Tedun makrama kalih ngetang perobahan sahanan ayahan, ngawitin nangken (Galungan); sejawaning nganinin Ayah Balu kaetang pramangkin;
- (2) Sehanan wusan makrama kaetang pramangkin.
- (3) Nangken ayatan panumaya inucap (Galungan) Kelihan Banjare sowang-sowang ngawantunin nyacah jiwa, ngetangang kalih mastikayang pekraman miwah ayah-ayahan kadi ring ajeng (1), ring wewidangannya sowang-sowang.
- (4) Kapastiyen cacah jiwa, pamekas indik keterangan miwah ayah-ayahan kapikukuhin antuk pamutus paruman Banjar sowang-sowang, dumugi kengin laksanayang.
- (5) Kepastikayang inucap digelis kasuratang ring ilikitan/pipil utawi Kartu Krama.

Pawos 15

(1) Sehanan warga desane patut :

ha. Dredha atuang ring Desa;

na. Tinut saturut ring sedaging Awig-Awig, Pararem-Pararem miwah
geguwet-geguwet Desa siosan;

ca. Tan maren ngutsahayang mangda desane nyidayang nyujur tatujonya
kadi mungguh ring pawos 4 ring ajeng.

ra. Natak panes tis kartin desane.

(2) Wong desane sane sinanggeh tamiu patut :

ha. Tinut ring tatiwak desane nganinin indik ngupadi kasukertan Desane ring
sekala.

na. Tan wenten ngimpasin sepemargin kartin desane.

Pawos 16

(1) Sahanan wong Desa rawuhing sang sinanggeh tamiu, wenang polih
pasayuban ngemanggehang kasukertan raga, Agama saha druwenyane
sowang-sowang.

(2) Sahanan warga Desa wenang polih pengayom Prajuru manut dresta
nganinin :

ha. Sangaskara kauripannya sane mabuat, sane mastikayang iketan sulur
pakulawargan;

- na. Kasukertan miwah kasucian dewek, Parhyangan miwah karangnyane sowang-sowang;
- ca. Kasukertan druwennya sowang-sowang;
- ra. Kabawosin tur katiwakin pemutus sehanan wicarannya.

Pawos 17

- (1) Sahanan Ayah Ngarep miwah Ayah Balu, patut nyarengin paruman Desa utawi banjar, saha wenang nyarengin pamutus.
- (2) Sahanan ayah siosan sejaba Teruna Nyoman miwah Daha Nyoman wenang nyarengin pamutus.

Palet 2

Indik Parajuru lan Dulu Désa

Pawos 18

- (1) Desa Adat puniki kaenterang olih Kelihan Desa (Bendesa Adat).
- (2) Banjar miwah tempekan kaenter antuk Kelihan Banjar miwah Kelihan Tempek nunggal-nunggal.

(3) Kelihan Desa/Bendesa Adat, Kelihan Banjar miwah Kelihan Tempekan kaadegan malarapan antuk pemilihan olih parumannya sowang-sowang anut dudonan.

(4) Sahanan Kelihan patut mawiwit Krama Ayahan Marep.

Pawos 19

(1) Bendesa Adat (Kelihan Desa) miwah Kelihan Banjar sowang-sowang kesanggra olih prajuru-prajuru.

ha. Pangliman maka wakilnyane

na. Panyarikan.

ca. Patengen (Bendahara)

ra. Pamijian (Juru Arah).

(2) Wewilangan penyanggrane madudonan anut ring akeh kedik krama gegambelan miwah pakaryane.

(3) Prajuru inucap ring ajeng (1) kejudi olih kelianyane sowang-sowang.

Pawos 20

(1) Swadarman Bendesa Adat (kelihan Desa) miwah Kelihan Banjare sowang-sowang lwire :

ha. Ngenterang paruman-paruman Desa/Banjar.

- na. Ngenterang pengelaksanaan sedaging Awig-awig, miwah pamutus.
- ca. Ngeraksa saha ngatur tataning ngangge seraja brana druwen
Desa/Banjar.
- ra. Nuntun tur ngenterang krama rawuhing warga Desane ngupadi
kasukertan sakala niskala.
- ka. Nuntun saha nyaksinin tata cara miwah sangaskaraning kauripane
mabuat, sane ngilitang sulur pakuluwargan.
- da. Nuntun saha ngenterang warga Desa/Banjar ngupadi nginggilang
Sanghyang Agama, kasucian Kahyangan-Kahyangan, kasucian
Pawongan, kasucian Palemahan miwah tata caraning ngangge Setra.
- ta. Mawosin kalih niwakang pamutus marep ring wicaran warga Desane.
- sa. Ngawakilin Desa utawi Banjaranne matemuang bawos ring sapa siraugi.
- wa. Miwah sane siosan manut Dresta.
- (2) Tata carane ngelaksanayang Swadarma ring ajeng, tan marep patut anut ring
Awig-Awig, Pararem Dresta miwah pamutus-pamutus Paruman Desa/Banjar
kapungkur ipun.
- (3) Pangelaksanane ring ajeng patut kesiarang ring paruman Desa utawi Banjar
kapungkur ipun.

- (4) Bendesa Adat (kelihan Desa) miwah Kelihan banjar, samakuta natak pmutus paruman Desa utawi Banjar, nganinin pengelaksanaan sawadarmanya sowang-sowang.

Pawos 21

- (1) Ulih-ulihan Kelian Desa (Bendesa Adat) miwah Kelian Banjare :

- ha. Upon-upon tanah pecatu;
- na. Leluputan salwiring pakenan-kenan;
- ca. Cenengan sahananing duman ring Desa utawi Banjar;
- ra. Miwah ulih-ulihan siosan manut pararem Desa utawi Banjar.

Pawos 22

- (1) Swadarman prajuru-prajurune siosan wantah nyanggra nyerayanin Kelihan Desa (Bendesa Adat), utawi Kelian Banjar sowang-sowang anut dudonan.
- (2) Ulihan-ulihan prajuru inucap manut kadi daging pararem Desa utawi Banjar manut dudonan.

Pawos 23

Indik Kasucian / Kasukertan Desa

- (1) Prajuru tan maren nuntun I Krama mangde kasucian Desane sida ajeg.

Pawos 24

- (1) Prajuru tan maren nuntun I krama mangda kasucian Desane sida ajeg.
- (2) Sane patut ketitenin, sahanan pamargine nyapa Krama, sane sinanggeh duskerta miwah ngeletehin Desa. Upami :
 - ha. Salah timpal jadma masanggama ring wawalungan;
 - na. Gamy-gamanane sane katelanjur;
 - ca. Panguman-panguman ring sabha.
 - ra. Miwah sahanan sane sinanggeh ngeletehin manut ring agama.
- (3) Sang kacihnan malaksana kadi ring ajeng, patut kasisipang, marisudha Desa sepatutipun.

Pawos 25

- (1) Prajuru nuntun mangda sahanan upakara Desa Pakramane sidha kemanggehang sakasidan, agung alit anutang ring kawentenannya, upami : ngusabha Desa, Ngusabha Nini, lsp.
- (2) Prade wenten cihna kadurmanggalaan jagat, Prajurune digelis ngutsahayang pamarisudha nunasang ring sang sadhaka.

Pawos 26

- (1) Upakara miwah brataning sesepan taler patut kaajegang.

- (2) Prajurune nuntun saka midabdabin, mangda Desane sidha trepti ring sipeng
Amati Genine, wong Desane sami mangda atuang nihutin.

Pawos 27

- (1) Prajurune taler patut nuntun I Krama, mangda kasukertan Desane satata
sidha ajeg.
- (2) Lwir sane patut ketitenin, upami :
- ha. Sahanan wawatesan tanah (margi, setra sakalwire) rawuhing tembok,
pagehan, punden, lsp.
- na. Sawen, salwiring sawen.
- ca. Miwah sahanan cihna kasukertan.
- (3) Sang kacihnan ngerusak, wenang tiwakin pamidanda sapatut ipun.

Pawos 28

Indik Leluputan

- (1) Desa miwah Banjare mepaweh leluputan ayah utawi pekenan-pekenan ring
seng inggiling linggih utawi sag kaolas asih.
- (2) Sor singgih leluputane miwah bacakan sang luput keunggahang ring
perarem.
- (3) Sejabaning prajuru Desa, sang pastika patut polih leluputan pemekasya :
- ha. Para Sadhaka.
- na. Para Pamangku Kahyangan Desa.
- ca. Sang Sakit Tahunan.

ra. Wong cedangga banget.

ka. Wong alit ubuh.

Palet 3

Indik Kukul

Pawos 29

- (1) Kukul Desa miwah banjar-banjare tan wenang tepak yan tan manut sekadi daging Awig-Awig puniki.
- (2) Tabuh tetepakan kukul Banjar-banjare pastika masios-siosan manut tatujonnyane, lwire :
 - ha. Tengeran upakara yadnya Desa utawi banjar.
 - na. Tengeran wenten sinalih tunggil warga desa sane seda.
 - ca. Tetengeran wenten sinalih tunggil warga Desa istri sane mawiwaha.
 - ra. Tetengeran wenten sinalih tunggil warga desa madruwe oka.
 - ka. Tengeran ngawit ngelaksanayang pekaryan kadi sampun kearahang utawi kasiarang.
 - da. Tengeran ngurungang ngelaksanayang pekaryan.
 - ta. Tengeran wenten wong kepelegandang.
 - sa. Tengeran wenten sinalih tunggil wong Desa kemalingan.
 - wa. Tengeran wenten wong Desa keamuk, kebegal utawi ke baak/baya pati siosan.

- (3) Kulkul Desane tan wenang ketepak sejawaning mula wantah tengerane patut ketiwakan ring wong Desanya sami, upami Yadnyan Desa, Paruman/Pakaryan Wong Desa sagrehan baya pati.

Pawos 30

- (1) Kulkul Desane miwah Banjare tan wenang katepak yan tan sangkaning bebebaskan utawi petuduh Kelihan Desa/Banjar sowang-sowang manut dudonan, sejawaning rikala pacang ngawentenang tengeran nganin kadi mungguh ring Pawos 29 angka 2. ta, sa, wa.
- (2) Sang manepak tan sangkaning petuduh, patut digelis atur supeksa ring Kelihan maka buatan penepake kadi ring ajeng.

Pawos 31

Sahanan kulkul banjar sewewidangan Desa Denkayu puniki, patut nyarengin katepak, prade wenten sinalih tunggil kulkul Banjar/Desa nyihnayang wenten amuk/bayapati.

Pawos 32

- (1) Suaran kulkul tengeran pekaryan patut ketedunin antuk ayahan anut ring daging dedauhan utawi siaranne.

- (2) Suaran kulkul tengeran baya (Pawos 29 angka (2) ta, sa, pamekas 1) patut katedunin antuk Sahanan ayahan lanang, inggihan ngarep, Pengele rawuhing Teruna Wayahan, saha gegawan pamitlung anut rupan bayane.

Pawos 33

Suaran kulkul sekaa-sekaa saka lwire ring Desa Denkayu, tan wenang nyawerin suaran kulkul Desa/Banjar.

Palet 4

Indik Paruman

Pawos 34

- (1) Indik Paruman parumane ring Desa ;
- ha. Paruman Desa, katuntun olih Kelian Desa .
 - na. Paruman Banjar, katuntun olih Kelian Adat.
 - ca. Paruman prajuru, katuntun olih Kelian Desa.
 - ra. Paruman Sekaa Teruna utawi daha, katuntun olih Kelian Teruna/Daha.
- (2) Sehanan Paruman sidha lumaksa yan sampun katedunin antuk sang patut nyarengin, bilih langkungan ring atenge kehipun.

- (3) Sehanan pemutus kautsahayang pisan mangde malarapan antuk gilik beriuk siu, bilih tan nyidayang, suarane makehan sinanggeh pamutus.
- (4) Ring sehanan paruman tan maren kamanggalain antuk pangarcana ring Ida Bhagawan Penyarikan saha widhi widhana/Cane.

Pawos 35

- (1) Paruman Desane patut ngawentenang nangken 6 sasih sepisan.
- (2) Nangken paruman sekadi ring ajeng, Kelian Desa (Bendesa Adat) patut nyiarang pemarginnya ngenterang Desane, pamekas nganinin indik :
 - ha. Munjuk lungsurin pekraman miwah ayah-ayahan.
 - na. Pemargi panelas miwah sulur arta berana druwen Desa.
 - ca. Pemargin utsahan Desa sane mabuat.
 - ra. Sahanan wicara saha pamutus-pemutusnya.
 - ka. Daging pararem-perarem miwah pasuara-pasuara sane mabuat.
 - da. Rencanan prajuru nganinin usaha kartin Desane Kapungkur.
 - ta. Miwah sane siosan.
- (3) Sahanan siaran ring ajeng katitenin saha katiwakin pemutus antuk paruman Desane.

- (4) Pemutus paruman inucap ring ajeng, sinanggeh sipat siku-iku patut katinutin antuk wong desane sami, pamekas antuk prajurune.

Pawos 36

- (1) Sejaba kadi munggah ring ajeng, paruman desane taler patut kawentenang, prade kawidhi olih Krama Desa sanistane sareng 2 (kalih) Banjar.
- (2) Sang ngawidhi patut mastikayang bantang sane sandang bawosang ring paruman inucap (rencana).
- (3) Paruman Desane kadi puniki taler patut katiwakin pemutus kadi munggah ring ajeng.

Pawos 37

- (1) Paruman, Prajuru Desane patut kawentenan sanistane ngeasah apisan.
- (2) Paruman inucap katuntun antuk kelihan Desa/Bendesa Adat.
- (3) Sahanan Prajuru Desa wenang nyarengin paruman Prajuru Desane.
- (4) Paruman Prajurune kawenangannya wantah ngerincikang tata upaya ngelaksanayang saha usaha pangarlanan saka lwire.
- (5) Sahanan rerancangan, bilih-bilih rencanan pararem sane pacang niwakin tetegenan ring i krama, tan wenang laksanayang sebanen kapikukuhin antuk pemutus paruman desa utawi banjar manut dudonan.

Pawos 38

Paruman Desane wantah sinanggeh pangawisesa sane wenang nyelem putihang tata ngenter desa manut dresta.

Palet 5

Indik Druwén Désa

Pawos 39

Padruwen Desa Adat puniki sakadi ring sor :

- (1) Kahyangan Tiga
- (2) Karang-karang ayahan desa.
- (3) Setra-setra
- (4) Palaba Pura, minakadi sawah
- (5) Lalanguan, makadi ilen-ilan wali pura, tatabuhan padruwen banjar utawi tempekan.
- (6) LPD.

Pawos 40

- (1) Parajuru wenang ngetangang pamupon laba Pura Lan sapanunggalan druen desa.

- (2) Pikolih lan pamuponnya kaanggen prabeya piodalan saha wawangunan ring Pura.
- (3) Nyabran pasangkepan Desa, parajuru pangemong padruwen Desa ngawentenang pari indik munjuk lungsuring padruwen krama desa.
- (4) Sakaluwiring druwen Desa patut wenten ilikitannya.
- (5) Tan kalugra ngadol palaba Pura, sajabanin wenten tatujon tios manut perarem Desa.

SARGAH PAT

SUKERTA TATA AGAMA

Palet 1

Indik Déwa Yadnya

Pawos 41

Kahyangan-kahyangan sane wenten ring wewidangan Desa Denkayu, 2 soroh kawentenanipun lwire;

- (1) Panyiwian Desa.
- (2) Panyiwian Pemaksan-pemaksan siosan.

Pawos 42

- (1) Prajurune patut nuntun ngenterang Krama Desane ngemanggehang kesucian Kahyangan Desane.

(2) Bacakan letuh candalane sane tan dados ngeranjing ring Kahyangan Desane

lwire :

ha. Jadma luh sane sebel-kandel saka lwire upami (ngeraja swala, madrewe oka, karuron) manut sengker.

na. Jadma cuntaka sangkaning kepademan.

ca. Sahanan jatma patita (panak babinjat, wong beling kasenggama tan sinaskara, wong mamitra ngalang, wong sakit ila, Jadma buduh, miwah candala-candala siosan) sadurung kalukat keprasyascita manut agama.

ra. Sato agung ngawit babi ngagengang, sajawaning kalaning mapepada.

ka. Sahanan barang sane sinanggeh leteh manut agama (tulang/getih/bok sakalwir wiwitan watang, layudan Pitra Yadnya, lsp).

da. Miwah sahanan candala siosan.

(3) Ring Kahyangan tan wenang ngelaksanayang sahanan laksana sane sinanggeh ngeletuhin, upami :

ha. Memisuh kalih parusya siosan.

na. Majaljal/magerengan, bilih-bilih yan jantos kanin/metu rah.

ca. Makobetan, mewarih, mesanggama, miwah prawertine hala siosan.

Pawos 43

- (1) Kramane sane memanggih utawi uning munggwing wenten jadma ngeletuhin Kahyangan kadi munggah ring ajeng, patut atur uning ring prajuru.
- (2) Prade tan wenten nyadokang, wenang kasisipang sinanggeh saruron ring corah.

Pawos 44

- (1) Prajuru patut mastikayang pamangkune sane kengin munggah tedun ring pelinggih-pelinggih Kahyangan Desane, miwah ngiyasin pralinggane.
- (2) Sejabaning sang kapastikayang kadi ring ajeng, sapasira ugi tan dados munggah ring pelinggih-pelinggih miwah ngambil pralinggan Kahyangan Desane.
- (3) Taler patut kapastikayang indik sangawewenang nyanggra kasangaskara/kawintenin antuk Desane; sapunika taler upacara pitra yadnya ring sedane ke pungkur.
- (4) Pemangku-pemangku Kahyangan Desane kasangaskara/kawintenin antuk Desane; sapunika taler upacara pitra yadnya ring sedane ke pungkur.
- (5) Prajurune tan maren nureksa nitenin mangda i Pamangku ajeg nganutin sasanannya, dumugi tegeg keeningannya, saha kepastikayang ulih-ulihannya.

Pawos 45

- (1) Prajuru patut mastikayang indik piodalan miwah acin-acin Kahyangan Desane, agung alit miwah tata pengelaksanannya.

- (2) Tanah pelaba saha upon-uponnya, punya-punya sane katur kalih sahanan druwen Kahyangan Desane, sami kapastikayang miwah katitenin antuk prajuru.

Pawos 46

- (1) Kahyangan penyiwian pemaksan siosan, tata cara ngastitiang kasuciannya patut saeloan ring Kahyangan-kahyangan Desane, sejawaning karihinan madruwe dresta siosan.
- (2) Yan tan manut kadi ring ajeng, pralingga kahyangan inucap tan dados kasarengang ri kala samuha/nyejer ring Bale Agung kalaning pangasangan, pengasaban miwah upakara-upakara siosan.

Palet 2

Indik Resi Yadnya

Pawos 47

- (1) Sang pacang mapudgala/madwijati, sajawaning nunas panugrahan ring sang rumawos (Parisada utawi Pemerintah), taler patut masadok ring Kelian banjar miwah Kelihan Desa/Bendesa Adat.
- (2) Prajuru-prajuru Desa inucap patut sareng nureksa nitenin, mangde sulur kalih pemargine jati-jati manut ring kecaping Agama, sane patut katureksa pinih ajeng kacedanggan miwah kasucian sapamadegan sang madwijati (riwayat hidup) .

- (3) Prade wenten sinanggeh kanton samer, prajuru inucap patut atur uning ring sang rumawos, mangda panugrahan sang rumawos sidha jati-jati manut ring kecap agama.
- (4) Prajuru Desane inucap taler patut sareng nyaksinin pamargi upakarane.
- (5) Sapupute, prajuru desane patut digelis ngutsahayang mangda parab sang diniksan ring sahanan Ilikita kagentos antuk bhiseka kawikon manut panugrahan nabennya, saha nyiarang ring paruman Banjar/Desane.
- (6) Upakarane ngelinggihang pujane kapungkur patut kesaksinin, saha kasiarang sepatutnya ring paruman Banjar miwah Desane.

Pawos 48

- (1) Prajurune patut nuntun saha ngemanggalain Krama Desene, ngawas nitenin sapamargin para wikune ring wewidangannya, pamuat mikukuhin kesucian linggih Ida.
- (2) Prajurune/pamekas Kelihan Desa patut digelis atur uning ring nabennya, prade wenten kacihnan wiku sasaring laksana.
- (3) Atur piuning ring ajeng patut kadulurin cihna anut ring Tri Pramana (Bhukti, Ilikhita, Saksi).
- (4) Daging pemutus bawos sane katiwakan antuk nabennya digelis kasiarang ring paruman Banjar miwah Desane.
- (5) Prade pemutus tatiwake ring ajeng kapineh/kamanahang/ kapikayunin, durung sidha tinas apadang Prajurune atur supeksa ring sang rumawos (Parisada/Pemerintah).

- (6) Pemutus tatiwak Nabe sane sampun kasanggra antuk sang rumawos inucap, sinanggeh pemutus pastika tan kawicaran muwah.
- (7) Prajuru-prajurune tan wenang lumaksana matetiwak ring sang maraga wiku.

Pawos 49

- (1) Sang pacang mawinten/mapodgala makabuatan pacang mamargi ngemangkunin, Nyonteng, Kebayan, Dalang sakalwir pacang ngenterang yadnya, patut masadok ring Kelihan Banjar miwah Kelihan Desa (Bendesa Adat).
- (2) Prajuru-prajurune inucap patut ngawas nitenin mangda pemargine, manut ring kekecap miwah drestene.
- (3) Prajuru Desene wenang naweng ngalengin, prade kacihna sasar kecap utawi drestane.
- (4) Sang tan terima ring tetiwak prajurune inucap, dados nunas pematut ring sang rumawos (Parisada/Pemerintah).
- (5) Pemutus bawos sane katiwakan antuk sang rumawos ring ajeng sinanggeh pemutus pastika, tan kawicarayang.
- (6) Prajuru-prajuru desane patut sareng nyaksinin Upakaran sang mawinten, sapupute, patut digelis kasiarang ring paruman Banjar/Desa, tegap rawuhing wates kawenangan pangenter yadnya sane dados kemargayang manut penungrahan Dang Guru/Drestannya soang-soang.

Pawos 50

- (1) Krama Desane sami patut sareng ngawas nitenin katuntun olih Prajurune, mangda sahanan yadnya sane kawentenang kaicen pamuput olih pandita utawi sajana (Pemangku sakalwire), anut dudonan kadi kawenanganne sowang-sowang manut dresta.
- (2) Prade wenten ngelempasin bilih-bilih sane pastika nyumuka, prajurune wenang ngalengin utawi ngurungang yadnya inucap, prade katelanjur, yadnya saha phala wsananya sinanggeh tan wenten sah.
- (3) Prade sang katiwakan tan manut ring pamutus Prajuru, wenang nunas bawos ring sang rumawos (parisada/Pemerintah), sane patut ngicenin pemutus pamekas tan wicaran muwah.

Pawos 51

- (1) Ring Pura-Pura Kahyangan Tiga patut kadegang juru sapuh utawi pamangku.
- (2) Pamangku Kahyangan Tiga tan keneng cuntaka, sajabaning wenten kamatian ring paumahannyane.
- (3) Prade sinalih tunggal pamangku Kahyangan Tiga kapialang pangacin kengin kamargiang olih pamangku Kahyangan Tiga sane tan kapialang manut pasadok pamangku ring Bendesa.
- (4) Ngadegang pamangku manut dresta sakadi ring sor:
Ha. Ngawilangan saking turunan utawi panyade.
Na. Nunas pawuwus Widhi.

Ca. Pilihan krama desa (sane sampun alaki rabi).

(5) Pamangku patut raadiksa widhi ring kanyangan inucap, prabeya patut kamedalang olih krama pangemong.

(6) Krama sane tan dados kadegang pamangku:

Ha. Cedengga saking wawu mijil, luire: peceng, sengkok, cungh, belang, jeriji tuna, jeriji lebih, bidug, bancih.

Na. Sakit ila, buduh, ayari, sakit beseh/beteg, sakit tahunan.

(7) Manawi Pamangku Kahyangan Tiga seda, patut kasanggra antuk krama desa, tur tan wenang pendem nanging patut kaaben. Indik upakarnya sami katampa antuk krama desa.

Pawos 52

Swadharma Pamangku Kahyangan Tiga luire:

(1) Ngenterang upakara piodalan ring Kahyangan utawi ring sowang-sowang pakubon krama.

(2) Pamangku patut nelebang daging pustaka dharmaning kapamangkuan.

(3) Pamangku mangda ngutsahang raga uning ring nyurat utawi ngawacen aksara Bali miwah aksara latin.

Pawos 53

Patias utawi pikolih pamangku Kahyangan Tiga luire:

- (1) Pangangge putih kuning arangsukan, sakirang-kirang ipun nyabran a warsa apisan.
- (2) Luput ayah desa kalih papeson.
- (3) Polih nandu laba utawi pituas tiosan manut perarem.

Pawos 54

Pamangku kagentosin riantukan.

- (1) Seda
- (2) Pinunas ngaraga, manawi kageringan Lan sapenunggalnya.
- (3) Kawusang antuk krama desa manawi malaksana sane tan patut (asta dusta), manut pararem.

Palet 3

Indik Pitra Yadnya

Pawos 55

- (1) Sang pacang ngangge Tunon/Setra, patut nunas bebebaskan ring Kelian Desa (Bendesa Adat), saha tatanin ngangge manut Kadi dresta miwah pitudula Prajuru inucap.

- (2) Wong Desane sami patut nitenin, mangda sahananing letug setre. tan wenten ngelalah/kebakta ke Desa Pakraman, bilih-bilih ke Kahyangan - Kahyangan.
- (3) Prade sawane sane pacang katuniel utawi katanem ring setra boya sawan. Warga Desa patut nawur Pananjung Batu/Panukun Setra Agung Alit manut Pararem.

Pawos 56

- (1) Krame sane pacang atiwa-tiwa, patut nunas kabebasan ring Kelihan Desa/Bendesa Adat.
- (2) Prajuru inucap nitenin tur nuntun mangda yadnya punika tinas, tan nyantulin kasukertan Desa, pamekas tan wenten nyepungin kasucian Desa utawi Kahyangan.
- (3) Pakaryan Atiwa-tiwa utawi ngupakara sawa patut kapeserah ring Banjar.
- (4) Banjare sumakuta nyanggra, utawi ngewehin kebebasan manut Awig-awig banjar.

Palet 4

Indik Manusa Yadnya

Pawos 57

- (1) Manusa Yadnya inggih punika upacara-upacara dharmaning manusa ngawit saking palemoning kama petak kalawan kama bang sajeroning garbha, nyantos kalayu sekar.

(2) Upakara kadi ring ajeng madi Jonan sakadi ring sor

Ha. Magedong-gedongan duk pangerempinian ibiang

Na. Embas rare

Ca. Kepus udel

Ra. Roras rahina

Ka. Tutug kambuhan (42 rahina)

Da. Nigang sasihin

Ta. Pawetuan/odalan (6 sasih)

Sa. Tutug kelih (ngeraja wadone, ngembakin lanange)

Wa. Matatah/mepandes

La. Mawiwaha

Ma. Mawinten

(3) Upakara-upakara inucap nista, madia uDenkayuya manut sastra agama miwah catur dresta, maka buatang desa dresta.

Palet 5

Indik Bhuta Yadnya

Pawos 58

(1) Bhuta Yadnya inggih punika upakara-upakara pabiyukala ring pertiwi Lan kahyangan, sarwa prani saha upakara-upakara babuatan ipun.

(2) Upakara pabiyukala ring sarwa prani, luire:

Ha. Ring sarwa tumuwuh ritatkala Tumpek Pangatag (Saniscara Kliwon Wariga).

Na. Ring sarwa ingon-ingon rikala Tumpek Andang (Saniscara Kliwon Wuku Uye).

Ca. Upakara pakala-kala manusa anut wiguna, kabawos pabyakala.

(3) Upakara pabyakala ring pertiwi, ring Kahyangan, miwah babutan kawastanin caru.

(4) Upakara pacaruan kadi riag ajeng, nista, madia, uDenkayuia manut wiguna kadi ring sor:

Ha. Eka sata

Na. Panca sata

Ca. Panca sanak

Ra. Panca kelud

Ka. Rsi gana

Da. Tawur agung

Ta. Miwah sane tiosan

(5) Sajabaning ring ajeng kawentenang upakara:

Ha. Yadnya sesa utawi banten saiban, rikalaning wus ngarateng.

Na. Masapu-sapuh rikala pacang wali ring Pura.

SARGAH LIMA
SUKERTA TATA PAWONGAN

Palet 1

Indik Pawiwahan

Pawos 59

Ngerorod / Ngerangkat

- (1) Kramane sane nampi wong ngerorod, patut pramangkin masadok ring Kelihan banjarnyane.
- (2) I Kelian patut digelis nureksa tur netes sang ngerorod maka buatan marityaksayang manut utawi singsal pamargine ring drestane.
- (3) Bilih pamargine sampun nepek ring dresta, sang ngerorod miwah sane nampi polih pamikukuh pasayuban Banjar minakadi Kelihan/Prajuru-prajuru.
- (4) Prade pamarginne tan manut ring dresta, I Kelihan patut digelis malasang sang kinira kira katetehan kawehin pasayuban ring jeron Kelihanne.
- (5) I Kelian digelis patut ngutsahayang metahu wirang sang katetehan punika. Prade linggihnyane doh, dura desa/dura kecamatan utsahane katur ring sang rumawos (Kepala Desa/Camat) manut dudonan.

- (6) Sang mamiseka, sesampune kaparitetes wasta kalih umahnyane, katundung saking wewidangan Banjar inucap.
- (7) Kramane sane nampi patut katetes katureksa. Manut ring prakertinyane, yan saruron ring corah nyarengin misekayang, wenang danda agung alit manut pamutus Kelihan tepekang ring pararem.

Pawos 60

- (1) Sang maseserep sane pacang netes pangerorodan, patut masadok tur nunas panuntun ring Kelihan Banjar. I Kelihan Banjar patut nureksa natasang saserep punika, jati tan iatine patut pernah wirang sang ngarorod.
- (2) Yan linggihnyane jati-jati pernah wirang, I Kelian patut digelis ngater seserep punika ke umah genah sang ngerorod.
- (3) Sang meseserep patut tinut ring sapituduh Kelihan nganinin tata netes pangerorodan lwire :
- ha. Ngeranjing ke umah inucap tan langkungan ring 2 diri.
- na. Tan kengin makta sanjata/gagawan sakalwire;
- ca. Yan kengin matingkah kalih mabawos parusya nantang-nantang.
- (4) Senapake I Kelihan patut midabdabin mangda tatacara penetesanne trepti, maka buatan mangde anake istri sane ngerangkat jati-jati polih nerangang idepnyane sebebap ipun. Wirang saserepe mangde polih mireng ucapan anake istri punika,

lwire pidabdab :

ha. Ariake istri kagenahang ngaraga, tan dados anak sios nampekin prade
kirang ring tigang depa, tur tinas ring inange.

na. I Kelian nuntun nulurang mangda sang maseserep polih metaken ring
sang istri punika.

Ca. I Kelian nyumakutayang pamekas ring sang istri, mungging dane
pacang ngicenin pasayuban manut ring daging idep sang istri. Yan pada
arsa pangrorodane sang maseserep pacang katulak, sang sangkaning
pepaksan, sang lanang pacang katiwakin pamidanda/katundung.

(5) Pamupute I Kelihan dumugi melaksana manut ring pamutus idep anake istri
inucap.

Pewarangan Miwah Pakula Wargan

Pawos 61

(1) Sinalih tunggil krama pacang ngewarangang kulawargannya, patut masadok
ring Kelian Desa (Bendesa Adat) miwah kelian Banjarnya, sanistane tigang
rahina sebaner dewasa ancer pewaranganne.

- (2) Prajuru-prajuru inucap patut maritetsan pewartanganne punika, prade pemargin sampun manut ring drestaning pewartangan, kaicen pasayuban sepatutnya. Prade tan manut, prajuru-prajuru ngutsahayang ngicenin panuntun larapan pamargine side manut dresta care.
- (3) Yan pewartangan inucap lempas ring kekecap agama (upami Gamy gamana) sane sinanggeh ngawanang terak jagat, prajuru-prajuru punika patut ngurungang pewartangane tur melasang lanang wadon inucap.

Pawos 62

- (1) Prade panureksan ring ajeng nyihnahyang pewartangane sampun anut ring drestane, upakarane dados lanturang.
- (2) Ring panemayan upakara widhi widhananya, prajuru-prajuru inucap patut nodya make saksi utama.
- (3) Prajuru-prajuru saksi punika patut nitenin indik sulur pamargin pewartangane, bilih-bilih yening wenten indik sane mabuat, upami babaktan tatadan, jiwa danan sang pradhana, sulur purusa pradhana lsp.
- (4) Kelihan Banjare digelis nyuratang pewartangan inucap ring Ilikitannya, saha nyiarang ring paruman Banjare kepungkur.

Pawos 63

- (1) Sinalih tunggil Krama yang pacang ngidih Santana patut masadok ring Kelihan Banjarnya, sanistane asasih (35 rahina) sebanen dewasa pemerasan.
- (2) Kelihan inucap patut nyiarang ring Banjar, saha ngaturang ring Kelian Desa/Bendesa Adat mangda kasiarang ring wewidangang desane.
- (3) Sang rumasa keberatan ring pemerasan punika, sanistane masengker awuku sebanen dewasa, patut nunas bawos ring Kelian Desa/Bendesa Adat.
- (4) Kelian Desa/Bendesa adat digelis mawosan saha ngicenin pemutus bawos tepekang ring sastra miwah drestane siosan.

Pawos 64

- (1) Yan sulur tata pemerasane sampun manut, Kelihan Banjare ngicen pasayuban, larapan upakara widhi sidha laksanayang.
- (2) Ring panemaya upakarane, Kelian Banjar miwah Kelian Desa/Bendesa Adat ne patut nodya sinanggeh saksi utama.
- (3) Sawusan upakara, Kelian Banjare digelis nyuratang pemerasan inucap ring Ilikitanne miwah nyiarang ring sangkepan Banjare kepungkur.
- (4) Kala nyaksinin upakarane, pamekas kala ngunggahan ring Ilikita, patut pastika wenten utawi tan wenten berana saka lwire sane sinanggeh "Pemerasan".

Pawos 65

- (1) Prade sulur pemerasane tan manut ring drestene, Kelihan Banjare patut ngandeg sang pacang makarya, saka ngicenin tuntunan mangda kepuputang rihin babawos, sulur utawi wicaranya.
- (2) Pengelaksane ke pungkur, anut ring pemutus inucap.

Pawos 66

- (1) Sahanan krama sane ngerobang utawi ngajak anak siosan lempas ring drestaning pakula wargane, upami :
ha. Ngajak wong duduk-dudukan;
na. Nyama mulih saking makurenan;
ca. Jadma masundulang dewek;
ra. Rowang pastika jenek, miwah sane siosan, patut atur uning ring Kelian Banjarnya.
- (2) Pasadok ring ajeng kedulurin antuk keterangan pastika, nganinin linggih, artha berana miwah tetegenan kramane kalih sang kaajak inucap.
- (3) Krama sane ngerobang/ngajak, patut tanggung sumakata negenang lampah sang kaajak arepe ring kasukertan Banjar utawi Desane.
- (4) Kelian Banjare ngunggahang pasadok puniki ring ilikitannya, saha nyiarang ring paruman Banjare.

Pawos 67

- (1) Sang palas maperabian patut masadok ring Kelihan Banjarnya.
- (2) Pasadok ring ajeng kadulurin antuk keterangan pastika, nganinin saparaindikan palasnyane, upami : indik pahpahan guna kaya, tata ring ngupajiwa okannya bobotan kalih suka lwiring pamutus iketan alaki rabi.
- (3) Palas parabian sane patut kasadokang inucaping ajeng, inngih punika palas sane sampun pastika puput bawos, yadiastun sangkaning sami-sami lila laghawa, utawi sangkaning pamutusing pawicaran.
- (4) Prade sane kasadokang durung marupa kapalasang sane pastika puput, Kelihan Banjare patut ngicenin penuntun mangda sulur/bawos palase, kepuputang rihin.
- (5) Palas parabiane sami patut kedulurin antuk upakara saha widhi widhana masamsam ring Pura Desa Bale Agung, manut ring kecap Adi Agama.
- (6) Kelihan Banjare ngunggahang ring panglikita saha nyiarang Paruman kepalasan puniki.

Pawos 68

- (1) Yan wenten krama madruwe putra, masengker tigang rahina saking embasnyane patut masadok ring Kelihan Banjaranne.
- (2) I Kelihan ngunggahang sang embas punika ring ilikitan Banjar saha nyuarayang kulkul; yan lanang limang klentungan yang istri tigang klentungan.

Pawos 69

- (1) Yan wenten krama kalabuh bahangan, masengker aselid patut masadok ring Kelian Banjaranne.
- (2) I Kelian Ngunggahang sang seda inucap ring ilikitan Banjar, saha nyuarayang kulkul; yan seda lanang duang klentungan memanjang limang palet, yan istri tigang palet panjangnyane.

Pawos 70

- (1) Sinalih tunggiling krama yan wenten kulawarganyane istri kawarangang sangkaning kalilayang/ngarorod/ngerangkat, kepinang, utawi kejangkepeng, maletan, aselid patut masadok ring Kelian Banjarnya.
- (2) I Kelihan nyuarayang kulkul Nung ting sewatah amenit suwen ipun.

Pawos 71

- (1) Kramane sane nampi tamiu jantos makolem, patut masadok ring Kelian Banjarnya.
- (2) Prade tamiune pacang madunungan jantos langkungan ring awuku, I Kelian patut nireksain pisan munggwing maka buatannya miwah surat keterangannya.
- (3) Bilih-bilih yan pacang madunungan jantos sasihan utawi tahunan suwennya, patut kaunggahang ring ilikitan Banjar, patut kaunggahang ring ilikitan Banjar, tur dunungan inucap patut sareng nedunin masuka duka baya pati.

Palet 2

Indik Nyapian

Pawos 72

- (1) Pawiwahan kabawos wusan malarapan saking palas marabian utawi seda.
- (2) Wusan marabian riantukan silih sinunggil seda, jadma punika kabawos balu, makadi baki istri utawi balu lanang.
- (3) Palas marabian wenten kalih, pawos inggih punika sangkaning pada lila, muah sangkanin mawiwit wicara.
- (4) Sang ayat palas marabian patut atur upeksa pailikitan riyin ring sang rumawos, wastu tinas apadang pamutuse wawu para juru nyiarang kawentenania ring krama desa.

Pawos 73

Prade riwekas sang palas marabian kacihnan adung malih, patut ngawentenang sadu ring para juru desa, saha ngalaksanayang pawiwahan malih.

Palet 3

Indik Sentana

Pawos 74

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahane kapatut.
- (3) Prade pawiwahane tan kapatut ngawetuang sentana, mangda tan kantung kawastanin babinjat utawi asira, yogya kamanggah antuk panyangaskara.
- (4) Prade pawiwahan tan ngawetuang sentana kengin ngidih sentana maduluran upasaksi sakala niskala, punika kawastanin sentana paperasan.

Pawos 75

- (1) Sapisira ugi krama pacang ngidih sentana patut masadok riyin ring para juru, sanistane asasih sadereng pamerasan.
- (2) Parajuru nyiarang ring krama, sang sapisira ugi rumaksa tan lila mangda nyadokang masengker kalih wuku sabanen pamerasan, ring para juru.
- (3) Para juru digelis mawosin saha ngicenin pamutus nepak ring catur dresta miwah pararem.
- (4) Prade sulur paperasan tan manut ring kecaping ajeng, para juru wenang ngandeg sang pacang makarya, saha ngicenin panuntun mangila kapuputang riyin sulur utawi wicarania.

Pawos 76

- (1) Paperasan sane kapatut ring desa adat punika risampun maka cihna:
- Ha. Widhi Widana pamerasan.
- Na. Kasaksinin antuk para juru desa sane makelingang utawi ngilikitayang.
- Ca. Kasiarang ring krama desa.
- (2) Sane kapatut angge sentana kadi ring sor:
- Ha. Jadma magama Hindu.
- Na. Kulawarga saking purusa, prade tan wenten kengin saking pradana, yening taler tan wenten wawu kengin ring sapisira ugi.
- Ca. Kayogyang ngangkat sentana langkungan ring adiri, lanang utawi istri.

Palet 3

Indik Sentana

Pawos 77

- (1) Ngangkat sentana manut dadudonan patut macihna, antuk widhi widhana Likita saksi sane pinaka saksi prajuru Desa lan kuluwarga.
- (2) Sane mepekayun ngidih sentana patut sakirang-kirang ipun enam sasih sedereng dinane kaperas patut masadok ring parajuru.

- (3) Iparajuru patut numusang ring sang parayogiya mekadi perbekel/lurah tur nyiarang.

Pawos 78

Peperasan sinanggeh syah

Peperasan sinanggeh syah risampune maka cihna kadi ring sor:

- (1) Nenten wenten sane nyangkutin.
- (2) Widhi widana.
- (3) Kesaksinin antuk semeton pinih tampek saking sang kaperas lan lawan sang memeras kalih parajuru Desa lan dinas, saha kesiarang ring paruman.
- (4) Sané kapatut peras anggén sentana kadi ring sor :
 - ha. Jadma maagama Hindu.
 - na. Kulawarga saking purusa, pradé tan wénten kengin saking wadon yéning taler tan wénten wawu kéngin sakama-kama (sakita kayun).
 - ca. Kautamayang saking waris pancer kapurusa.
 - ra. Sinalih tunggil mawit saking kulawarga tunggal sanggah utawi mrajan, paibon lan dadia, utawi ngambil anak tios sakéwanten sang maagama Hindu.
 - ka. Kéngin ngangkat sentana langkungan ring adiri, lanang wiadin wadon.

Palet 4

Indik Warisan

Pawos 79

Sane kabaos warisan inggih punika tetamian sane merupa luwire:

- (1) Druwe tengah.
- (2) Karang paumahan, tegal, miwah carik.
- (3) Artha berana.
- (4) Pemerajan, dadia, miwah pura lan sepenunggilan ipun.
- (5) Peguna kaya, tetadan/jiwa dana, utang piutang, lan sepenunggilan ipun.

Pawos 80

Sane kebaos ahli Waris

Sane kebaos ahli waris luwire:

- (1) Perti santana saking purusa/wadon, rajeg peperasan.
- (2) Turunan purusa pernah ngunggahang mekadi rerame dinyama, misan, mindon.
- (3) Turunan purusa pernah kesamping, mekadi : keponakan, misan, mindon.

Pawos 81

Swadharmaning Waris

- (1) Nerima saha ngutsahayang tetamian saking kulawargannya, makadi ngrempon sanggah/mrajan, pura, saha pangupakarannya miwah ayah-ayahan pawaris.
- (2) Ngabenang ngelatur Atma Wedana /nyekah sang sane kewarisin.
- (3) Nawur/nampi utang-piutang lan sepenunggilan ipun.

Pawos 82

Wewarisan sane tan dados pah/keedum Wiadin keadol

- (1) Merajan/sanggah.
- (2) Pustaka mekadi: keris, tumbak, lontar/cakepan, lan sepenunggulan ipun.
- (3) Sane patut ngeraksa/ngupapira wantah santana sane ngemong karang/ayah ngarep.

Pawos 83

Pidabdab waris kawaris ring Désa Adat Denkayu :

- (1) Warisan, wawu kéngin kaepah, risampun kalaksanayang upacara Pitra Yadnya lan utang-utang pawaris buntas katahur.
- (2) Para ahli waris sami polih pahan sangkaning pagunakaya.

- (3) Sinalih tunggil ahli waris kéngin tan polih pahan pradé :
- ha. Nilar kawitan lan sasananing agama Hindu.
 - na. Alpaka guru rupaka.
 - ca. Sentana rajeg utawi pratisentana nyeburin késah mawiwaha,
sowang-sowang kabawos ninggal kadaton.
- (4) Boya ahli waris, kéngin muponin hasil anut dudonan inggih punika :
- ha. Sentana luh, salami durung késah mawiwaha.
 - na. Balu luh wiadin muani nyeburin (sowang-sowang boya sentana).
- (5) Pawaris kéngin mawéwéh rikala maurip pinaka jiwa dana,
tadtadan/pabekel, makacihna pawéwéh tetep ring oka sané késah
mawiwaha.

Pawos 84

- (1) Pradé sajeroning pakulawargan wénten ahli waris langkungan ring
adiri, patut :
- ha. Kawéntenang paigum indik pahan waris inucap;
 - na. Yan tan prasida, katunasang tetimbang ring Prajuru;

- ca. Pradé taler tan wénten cumpu ring panepas Prajuru, kaaturang ring Kerta Désa; pradé taler tan kacumponin, karerehang pamuput ring paruman desa, maka wasaning pamuput ring desa, ripet ten cumpu kéngin katunasang ring Majelis Alit / Majelis Madya / Majelis Agung, kaping untat ring Sang Rumawos (Pengadilan Negeri).
- (2) Pradé wénten karang kaputungan utawi tan wenten sané ngwarisin, Désané wenang nuréksa sulur pakulawaragannya sané dumun tur lantur kasiarang ring Désa, mangda sang patut ngwarisin, digelis nyelediinin karang inucap.
- (3) Pradé wates pawanengan 3 sasih sasampun kasiarang ring sowang-sowang Banjar taler tan wénten kulawarga sané nyelediinin, karang inucap wenang kaambil antuk Désa Adat, tur kaanggén sapatutnya manut pararem kadulurin antuk nglaksanayang pitra Yadnyan sang lina sané pecak ngamong karang inucap.

SARGAH NEM
SUKERTA TATA PALEMAHAN

Palet 1
indik Dusta lan Bhaya
Pawos 85

- (1) Sahanan Warga Desa uning ring wentennya jadma malaksana Dusta patut digelis utawi pramangkin atur uning ring Prajuru.
- (2) Laksanane sane sinanggeh Dusta kecaping ajeng, lwire bacakan ipun :
ha. Jiwa – Bhaya

na. Artha – Bhaya

ca. Geni – Bhaya

ra. Pelegandangan pemekas.

ka. Duracara ring agama.

- (3) Bilih mabuat kewentenan ipun, sang uning inucap patut digelis nyuarayang kulkul Banjar anut ring rupan pelaksanaan Dustane.

Pawos 86

- (1) Sahanan warga Desa prade uning ring kawentenan bhaya utawi panangkan bhaya, patut pramangkin atur uning ring Prajuru.
- (2) Bilih mabuat kawentenan ipun, sang uning patut digelis nyuarayang kulkul Banjar.
- (3) Bhaya utawi panangkan bhaya munggah ring ajeng, upamina: umah puwun, Balabar, lsp.

Pawos 87

- (1) Warga Desa sane kaicalan/kamalingan, prade pacang maseserep patut nunas kebebasan miwah penuntun ring Kelihan Banjarnya.
- (2) Prade genah maseserep ngelangkung ke Banjar siosan, patut nunas kebebasan utawi uwak-uwakan ring Kelihan Banjar irika.

- (3) Kelihan inucap ngicenin panuntun mangda tata carane maseserep manut kadi dresta.

Pawos 88

- (1) Sahanan warga Desa prade polih nuduk barang sakalwire, patut atur uninga ring Kelihan Banjarnya.
- (2) Kelihan inucap nyiarang barang dedudukan punika, mangda sang madruwe sidha mawantun ngamulihang barangnyane. Sang mariangkenin patut nyiddhayang nerangang/ninasang/wenten cihna bukti/nyihnayang, munggwing barang punika mula wantah padruwennya.
- (3) Prade jantos tigang sasih tan wenten jadma ngelingan, wenang kadruwe antuk sang manuduk (sane nuduk).

Palet 2

indik Karang, Tegal, lan Carik

Pawos 89

- (1) Sehanan karang pomahan patut :
- ha. Pastika wenten wates ipun.
- na. Mapemedal kerurung utawi kemargine (tan wenten kabengbeng).
- (2) Kelihan Desa/Bendesa Adat patut ngutsahayang mangde sawa karange kadi ring ajeng kawentenanya.

Pawos 90

- (1) Sehanan krama patut ngewatesin karangnyane sowang jantos sidha trepti nyatur Desa.
- (2) Wates karange majepitan, patut ketegen olih kramane sane mahuluan ke wates inucap manut dresta.
- (3) Taru miwah ulih-ulihan sane maurip ring watese kadi ring ajeng, kadruwe olih Krame sane negen inucap.

Pawos 91

- (1) Tanem tuwuh, tetangunan saka lwire miwah tata ngangge karang tan wenang naonin miwah ngawanang pocol utawi ngeletehin karang penyandingnya.
- (2) Prade wenten asapunika, wenang kasepat gantungin utawi katiwakin pamidanda siosan.
- (3) Tanemtuwuh miwah tetangunan sane mabaya ring penyandingnya, panyepat gantunge wenang ring wates.

Pawos 92

- (1) Tan wenang nanem utawi nunjel sawa miwah awak-awakan sawa ring karang pumahan.
- (2) Taler tan wenang/ngenahang barang sane ngeletehin ring karang pumahan, bilih-bilih yan kaletethanne ngelantur sinanggeh ngelimbak ngeletehin Desa manut agama.

Palet 3

Pepayonan

Pawos 93

- (1) Ngawitin, nanem tuwuh patut 2, 25 meter, ngejeroang saking wates.
- (2) Yan wenten Taru mentik sajeroning wates, patut taru punika kabah, kebagi kabagi tiga, asiki ketiba kedesa, kekalih ring sang nruwenang wates.
- (3) Yan wenten entik-entikan mekadi tiying, pisang, lan sapenunggil ipun, mentik nglintangin wates, wenang entik-entikan punika ketaban/kadruwenang olih sang madruwe karang sane kaentikin.
- (4) Yan wenten wit taru ngungkulin ke pisage, sang kaungkulin kaberatin patut sang iparajuru Desa, mekadi kelian Desa nibakang dadudonan kadi ring sor:
 - ha. Sang nruwenang kayu ika notor/nyepat gantungin kaicen waneng selaminnya awuku.
 - na. Yan jantos lintang ring sengker, dereng kelaksanayang, wenang iparajuru nibakang ring sang kataoning notor wiadin ngebah kayu punika.
 - ca. Saang/kayu punika patut katiban ring sang notor.
- (5) Yan wit kayu kakayon mayanin kapisaga, iparajuru patut sekadi ring sor :
 - ha. Natasang genah ipun.
 - na. Yan sampun wiyakti kapikayun miyanin makadi, wit ipun banget sendeh, wit ipun sampun ganjih, teda tetani bungkilnya, umahin semut,

ipunya sampun padem lan sapenunggulan ipun.

ca. I parajuru patut niwakin sang nruwenang wit taru ika ngebah mesengker selaminyane awuku.

ra. Yan lintang kadi sengker dereng kelaksanayang, wenang i parajuru nibakang ring sang kaberatang, ngebah taru ika.

ka. Wit taru punika katiba ring sang ngebah.

(6) Yan wenten taru mayanin sedereng lintang sengker, sang nruwenan luput saking kaiwangan.

(7) Yen wenten wit taru dereng wenten panyeken ring sang madruwe taru raris taru punika balbal wiyadin empak melarapin ngenanin wewangunan anak lian, sang madruwe taru ika luput saking kaiwangan.

(8) Yan wenten jatma ngebah, notor, taru dereng wenten pasubayan ring sang sane nyanding, raris mayanin wewangunane patut sang notor/ngebah kayu punika kadenda agung alit manut perarem, tur marayascita genah sane keni manut dresta

Palet 4

Wewalungan

Pawos 94

- (1) Sahanan warga Desa sane miara sakalwir wawalungan, patut sayaga nitenin negul utawi ngelogorin mangda ubuhannya tan wenten ngerusakin karang utawi abian anak siosan, bilih-bilih mangda sapunang jantos ngeranjing/ngeletihin Kahyangan.
- (2) Prade wenten wawalungan ngeleb saha ngeranjingan pekarangan siosan, sang madruwe patut melungguhang ring sang neruwenang wawalungane. Bilih yang ngawanang wenten karusakan kedulurin antuk nunasang bawos ring Kelihannya, mangda katiwakan pamidanda Agung Alit manut sudosanne (pararem).
- (3) Bilih ring asasih jantos ping tiga sampun melungguhang, wawalungane wenang ketaban. Panabanan punika patut uningang ring Kelihan Banjare.
- (4) Wawalungan tatabanan inucap wenang ketebus olih sang nruwenang Agung Alit panebuse katiwakang olih Kelihan Banjar, kadulurin danda manut karusakanne sane kawetuang.
- (4) Bilih ring asasih jantos ping tiga mataban kadi ring ajeng, wawalungane wenang kaambil tan tebasan Kelihan Banjar.

Pawos 95

- (1) Prade wawalungane sane ngeleb ngeranjing ka Kahyangan, sang madruwe patut kasisipang antuk danda prebeyanna upakara pamarisuda sepatuta.
- (2) Tata carane ngelungguhang naban miwah nebas pateh kadi munggah ring ajeng.

Pawos 96

- (1) Sehananing warga Desa sane memeliara wewalungan/ingon-ingon, patut siaga nitenin, negul wiadin ngandangin mangde tan ngrusak kapisage, bilih-bilih ngranjing ka pura wiyadin ke pemrajan.
- (2) Yening wenten wewalungan leb/malumbar/ngrusak wiyadin polih nadah pamulan wenang sang nruwenang wewalungan ika kadenda agung alit manut perarem. Sejawaning kedenda sekadi ring ajeng, taler kasisipang mapengarga abiane sane kateda/kerusak agung alit ipun kaitung ring i parajuru Desa.
- (3) Yening wenten wewalungan ngranjing ke genah suci, makadi ke pura, merajan, wiyadin sinunggilan ipun yadiastu katut uri, sang nruwenang wewalungan punika patut kadenda merayascita/nyaruning genahe sane keranjingin agung/alit manut perarea kalih sastra dresta
- (4) Yening wenten wewalungan/ingon-ingon ketaban wetu padem tan sangkaning gumanti, tur wenten saksi, sang naban ika patut luput saking kaiwangan.

Palet 5

Wewangunan

Pawos 97

- (1) Saluwiring wewangunan mangda kautsahayang mangda manutin kecap asta bumi miwah asta kosala kosali.
- (2) Yan Wenten ngawitin ngewangun raris wewangunan punika nglintangin wiyadin ngungkulan kepisage mekadi capcapan utawi sinunggil ipun, sang kaberatang patut melungguh ring sang madruwe wewangunan ika, yan parade sang madrebe wewangunan ika memengkung, tur mangde sang madrebe wewangunan ika, mugar/mongkar saha tan polih para biya/kepocolang.

Palet 6

Indik Karesikan utawi Kabersihan

Pawos 98

- (1) Asing-asing Warga Désa tan wenang :
 - ha. Ngembahang toya sané mawit saking badan wewangunan, paciringan, kamar mandi, pawaregan miwah sané siosan sané ngwetuang romon, bilih-bilih jantos ngwetuang ambu kawon ka pakarangan anak lian miwah ka marginé.

na. Ngentungang luu-luu ka pakarangan anak lian, ka marginé miwah ka telabahé.

- (2) Sowang-sowang Warga Désa patut makarya paciringan, mangda kabresihan pakarangan miwah karahajengan Désané prasida kapanggih.
- (3) Sang mamurug kecapé ring ajeng, patut keni pamidanda manut Pararem.

Palet 7

Panyanggra

Pawos 99

- (1) Pakaryan druwen sinalih tunggil Krama sane mabuat, tata panyanggrannya kasuksara ring Banjarnya sowang-sowang.
- (2) Banjare wenang ngardi Awig-Awig ngemanggehang tata carane nyanggra pekantyan Kramane mungga ring ajeng.
- (3) Daging Awig-awig patut madarsana antuk saharsa parama tulung ring sang makarya, nanging tan maren miteketan kasusatian Kramane ring Banjar miwah Desa.
- (4) Bilih karyane dahat, bobot, Banjare wenang ngeruruh, penampih ring Banjar siosan.

Pawos 100

(1) Pekaryan sane patut kasukserah ring penyanggran Banjar luwire :

ha. Ngupakara sawa;

na. Sahanan Pengabenan yadiastun tan pesawa.

ca. Miwah pekaryan-pekaryan seosan manut ring Awig-Awig Banjare
(upami : ngampung, ngeraabin umah, lsp).

(2) Sajaba kadi inucap ring ajeng, pekaryan-pekaryan ring sor punika taler
kengin katunasang penyanggran banjar; luwir ipun :

ha. Sahanan Yadnya;

na. Ngisidang sakaluwir tetangunan (Bale, paon, jineng, lsp).

Pawos 101

(1) Awig-Awig banjar ring ajeng, tan kengin ngelaksanayang sarung
kacecirenin antuk Kelihan Desa/Bendesa Adat.

(2) Daging Awig-Awig patut tan maren ngadungang munggwing wibuh kincit
pakaryane ring agung alit panyambraman ring Banjar.

SARGAH PITU
WICÀRA LAN PAMIDANDA

Palet 1

Indik Wicàra

Pawos 102

- (1) Sane wenang mawosang minakadi mutusang wicara ring Desa, luwire :
 ha. Kelian Banjar prade sang mawicara sami-sami patunggilan Babanjaran.
 na. Kelihan Desa (Bendesa Adat), prade sang mawicara siosan Babanjarannya.
- (2) Prade sang mawicara tan wenten cumpu ring tatacaran Kelihan Banjar mawosin minakadi ring daging pamutusnya, wenang nunas bawos babandingan ring Kelihan Desa.
- (3) Pemutus Kelihan Desa arep ring wicara inucaping ajeng (2), sinanggeh wasananing bawos ring Desa.

Pawos 103

Sehanan wicara sane ngawiwit kacorahan saka lwire, miwah sinanggeh nungkasin daging Awig-Awig, pasuara miwah Pararem Desa utawi Banjar, patut raris kebawosin tan nyantosin pasadok.

Pawos 104

- (1) Sahanan wicara patut katepasin jantos pastika janten Twang patutnya nungkasin antuk : Tri Pramana (Bhukti, Saksi miwah Ilikita).
- (2) Pemutus patut tan maren nepek Ring Catur Dresta (Satra Purwa, Loka miwah Desa Dresta).
- (3) Sahanan pemutus patut tan maren ngupadi :
 - ha. Mangde Warga Desane sayan pastika uning ring wawatesan Twang patuta.
 - na. Mangda sangkaon tatas uning ring kaiwangan deweknya.
 - ca. Sang molih tan maren katuntun mangda sampun bas nginggilang kupatutannya, lila laghawa nyampurna sang sisip.
 - ra. Nyapsap bibit-bibit paminehe mamusuh-musuhan.

Pawos 105

- (1) Kelihan Desa/Bendesa Adat patut nunasang pematut ring sang rumawos, prade wenten wong Desa amandal ring pemutusnya bilih-bilih yan punika sinanggeh ngawanang Duskertan Desa.
- (2) Wong Desa sane keberatan ring pemutus Kelihan desa/Bendesa Adat, wenang nunas bebandingan ring pemerintah.

Palet 2

Indik Pamidanda

Pawos 106

- (1) Desa utawi Banjare wenang niwakang Pamidanda ring wong Desane sane sisip.
- (2) Tatiwak inucap kalaksanayang olih Kelian Desa/Bendesa Adat utawi Kelian Banjar nunggal -nunggal manut dudonan Bacakan pamidande lwire :
 - ha. Ayahan panukun kasisipan.
 - na. Danda Artha.
 - ca. Panikel-panikel urunan utawi panikel dedandan.
 - ra. Upakara panyangaskara.
 - ka. Kanorayang kahuwusang makrama.

Pawos 107

- (1) Pamidandane sane katiwakang patut manut ring Awig-Awig, pasuara, pararem, utawi Dresta miwah Agama, miwah adung ring kasisipanne.
- (2) Agung Alit pamindandane sane katiwakang ngesor singgih manut ring kasisipanne.

Pawos 108

Jinah utawi Raja Berana pamidandane ngranjing dados druwen Banjar utawi Desa manut dudonan.

Indik Rarampagan

Pawos 109

(1) Krama sane langkungan ring tigang sasih amandel utawi negungin urunan, miwah dadandan, wenang kerampag.

(2) Tata cara ngerampag patut tan mari kadi ring sor :

ha. Kalaksanayang olih Kelian banjar, kasarengin Krama pinaka saksi sakehe tigang diri.

na. Sang karampag tan dados ngalangin sang ngerampag, saha tan maren sareng nyaksinin pemargin rarampaganne.

ca. Sang Ngerampag sangkaning darsana ngambil barang-barang rarampagan, akehnyane manut ring agung alit hutang ring I Krame Utawi nyawenin tanem tuwuh (tatangunan) sane karampag.

ra. Kelihan Banjar miteketang mangda barang rarampaganne gelis katebas masenger 9 (sanga) rahina. Ring Dasa rahinane pacang kalelang.

Pawos 110

Rarampaganne kasengkerin, mangda sampunang jantos :

ha. Nganinin salwir barang sane patut inggilang manut Agama miwah Dresta.

na. Ngicalang cihna kamanusan sang kerampag.

ca. Mademang usaha pangupajiwan sang karampag.

SARGAH KUTUS

NGUWAH-NGUWUHIN AWIG-AWIG

Pawos 111

- (1) Nguwah-nguwuhin awig-awigdesa adat puniki kalaksanayang antuk paruman desa.
- (2) Perarem-perarem pinaka panyahcah, kengin kailikitayang saha Kalingga tanganin olih para juru desa, miwah kasaksiang tur kalingga tanganin olih perbekel/kepala desa.
- (3) Yen wenten wicara nenten menggah ring awig-awig puniki, mangda kahatur ring sang rumawos, tur pamuputnyane mangda kailikitayang
- (4) Sakaluiring sane durung kabawos sajeroning awig-awig puniki patut calaksanayang manut dresta.
- (5) Paruman Desa utawi Banjare patut ngamedalang Perarem manut dudonan.

(6) Daging sehanan Perarem patut saeloan ring Awig - Awig.

(7) Sane patut kaunggulan ring pararem, makadin ipun :

- ha. Dewasa ngawitin pemargin pokok-pokok Awig-Awig sane mabuat;
- na. Rerincian panyahcah daging Awig-Awig sane mabuat;
- ca. Agung Alit penikel-penikel, danda-danda lsp.
- ra. Tata sulur ngemargiang daging Awig-Awig.
- ka. Sehananin dedosan, angge mitegepin daging Awig-Awig.

Pawos 112

(1) Paparuman Prajurune wenang ngamedalang pasuara-pasuara, mitegepin daging Awig-Awig Desane.

(2) Daging pasuarane tan maren patut

- ha. Saeloan ring daging Awig-Awig.
- na. Manut ring Adat Agama, Castra, Purwa, Loka miwah Desa Dresta;
- ca. Nyantenang Agung Alit dandannya, yan kapurug.

SARGAH SIA

SAMÀPTA

PAWOS 113

- (1) Awig-awig puniki kakardinin antuk, saking, olih krama desa adat sami malarapan antuk dresta, minakadi sastra dresta, desa dresta, loka dresta, miwah purwa dresta.
- (2) Awig-awig puniki puput sinurat, saha upacara pasupati tur ngawit kamargiang ring rahina tanggal, saha kalingga-tanganin antuk para juru minakadi prajuru Desa Adat miwah Kelian Dinas
- (3) Awig-awig puniki malih kaparipurnayang lan sampun kasobyahang, kapiteges lan kacumpuang duk Paruman Agung Desa Adat Denkayu ring rahina Wuku pinanggal masehi 2012, kalinggatanganin antuk Bendesa kapikukuh antuk Palunggung Bupati Cakraning Jagat Badung saha kalikitayang utawi kacatet ring Pemerintah Kabupaten Badung.
- (4) Kelian Desa/Bendesa Adat kala ngemargiang sedaging awig-awig miwah utsahan Desa, patut tan maren :
 - ha. Saeloan utawi mawirasa ring sahanan prayoga sane taler ngawiwenang wong desane, upami Perbekel miwah Pekaseh.
 - na. Ngawentenang galah pengala Desa mangda wong desane polih ngupadi pangupajiwa, nincapang pangeweruh miwah usaha neri-neri swosan.

- (4) Awig-Awig puniki kalingga tanganin antuk Kelian Desa (Bendesa Adat) kasarengin antuk Kelian-kelihan Banjar, maka cihna pemutusnya.
- (5) Katur ring Bapak Perbekel miwah Camat mangda katureksa/kalingga tanganin, maka murdha pamikukuh.
- (7) Sapunika taler katur ring Bapak Bupati Badung, mangda katureksa/kalingga tanganin, maka murdha pamikukuh.

Lwir sang sane ngalingga tanganin,

Bendesa Adat Denkayu



Klihan Banjar Adat Denkayu Delodan



Klihan Banjar Adat Denkayu Baleran,



Saksi - Saksi

